

知止齋詩集

知止齋詩集卷第一

常熟 翁心存

古今體詩九十七首

起嘉慶十七年壬申是年先公二十二歲除潛虛府君服秋以

劣生吳朝棟牽控事
赴海州歲盡旋里作

擬古

王申

顛氣凌八極曾雲積秋陰平原莽無際肅肅翔征禽高樓有佳人激懷攬古今引領無儔匹臨窗理瑤琴一彈飛泉動再彈江月沈不惜朱絃絕所痛無知音清商發中夜臨風抗哀吟亮無高飛翼惻然傷我心

黃鵠餌稻梁園池受羈縻白龍而魚服乃爲漁者欺彼

麟鳳皇貴在人不知不擇時地見何異鴻與麋多欲
昧生理寡識蹈危機達人貴遺物君子慎知幾

庭中有孤松鬱鬱凌青霄託根早孤露不受凡鳥巢野
葛來附之虯曲紛牽撓引彼千尋蔓繫茲百尺條野葛
日以滋孤松日以凋涼飈歛凌厲草木上下飄野葛柔
且曲盤結何堅牢孤松勁而直摧折不崇朝

吾希魯朱家能識髡鉗奴吾慕孫賓石能匿賣餅徒古
來稱俠士椎埋納亡逋嗟嗟此二子卓犖大丈夫一言
脫患難百口保艱虞事成不受謝長揖歸田廬吾讀黨
錮傳鉤黨窮根株刊章下討捕敢舍伏重誅連引布天

下郡縣爲邱墟宗黨並殄滅况乃亡身軀惜哉史闕略
姓氏俱忽諸誰能陳此義此義今則無

我行涉長淮鶉火正在望原禽化妖蜃噓氣作駭浪兩
蛟挾船舢鬣角怒相向回飈入沙潭逝將魚腹葬中流
坐歌嘯氣足神逾王拔劍天地搖酣舞絕依傍陽侯戢
其威徑度幸無恙軒轅誅蚩尤圖形纛旗上大禹鑄九
鼎魍魎揆異狀聖世物咸若忍令神姦妨乾坤屏纖翳
滌除志彌壯不見薦艾獵殺蛇位楚相不見周建威斬
蛟拜上將

步出北郭門登高望原野側想千載人長眠九京下古

棺化寒灰衰草臥石馬幽宮走驚鼯陰房碎璠瓦恩讎
機已息悲歡事成假龍虎戰風雲狐鼠穴城社到此歸
虛無况復悠悠者茫茫天地間涕淚緣纓寫

陽春二三月夾道盈桃李枝葉交扶疏鄂跗燦紅紫蔘
收告休轅百卉皆披靡嘉植生南中冬榮深谷裏朱實
垂綠柯纍纍一何綺錫貢入禹甸作頌徵屈子以茲堅
勁姿喻夫耿介士嚴霜肅萬物奪彼以予此如何踰淮
北一旦化爲枳

左徒忠不收懷沙赴湘水李廣功不封自剄謝大理微
軀詎輕捐激烈良有以觥觥賈太傅經濟信奇士策名

登中朝年纔弱冠耳奈何一不用悲歌長江汜投書問
蛟龍賦服代銘諫可憐虛前席鬱鬱竟憂死丈夫生世
間豈但紆青紫上爲廊廟儲下爲蒼生起得喪齊窮通
毀譽絕憂喜希膏和其光保身固有俟人生駒過隙義
馭不停軌不立德功言草木同朽矣所以蔡中郎亡命
隱吳市焦尾豈不悲志在成漢史

東海有勇士名訖氏椒邱逝將適楚國飲馬河之洲河
神奪其馬拔劍誓報仇三呼復三躍聳身赴洪流三日
鬪蛟窟三夜探龍湫左手曳龍尾右手提蛟頭雷公隨
擊之日夜不得休一目雖云眇叱咤風雲愁竭來坐上

坐意氣隘九州一聞要離言折節爲純修嗟哉百鍊剛
化作繞指柔

飢不食鳩毒寒不披荆榛飢寒豈不患大患在殺身殺
身亦有分况乃以成仁毒脯香且美鳩酒清而醇驚瀑
鬱盤怒危厓削嶙峋摧此豫章木根柢蟠輪囷琴瑟不
中伐矯揉爲車輪廟堂非所願微命本勞薪大圓覆萬
物霜露皆陶甄蓼蟲不知苦桂蠹不避辛庶保耿介懷
用以質後人

伯起隱關西講堂下三鱸孔明耕南陽高吟梁父篇謝
公臥不起絲竹陶東山鄴侯少慕道采藥衡湘間四賢

豈不偉勳業垂千年當其未遇時耕鑿良安便一邱一壑際若將終身焉豈料後日事赫赫光史編乃知豪傑士窮達皆由天富貴非素願功名亦偶然熟審出處交貴在此志堅處窮洵不易處達良獨難

象數渺難測易傳推京房不密乃失身卒誤東平王吞爻兆異夢絕學傳仲翔骨節恨不媚萬里投炎荒緬惟彼二子元解窮陰陽胡爲觸駭機一旦掇禍殃亢龍貴無位未若安喪羊勿幕澤雖遠未若保括囊所以忠信事始可占黃裳知足身不辱守中悔乃亡智士通其變賢者循其常

孟堅抱賜書遂志賦幽通季英守青簡牧豕大澤中悲
哉茲兩賢弱冠遘閔凶遺經究終始弗墜簪纓風榮親
豈在位顯親豈在功保此太素質庶可對祖宗苟君秉
高行才子號八龍鄭君實達人家學傳小同潛德自有
耀不必爲三公失足辱門戶不如布衣終立身有遺訓
安可辭固窮

寄李香谷孝廉家懃

弱冠志耿介微尙耽詩書淮海事涉歷風塵滿襟裾孤
懷誰與共抱經鯉庭趨荒陬得良友情密歎迹疏

迹疏由交新情密悟夙因皎皎海中月藹藹嶺上雲澂

觀契真賞妙理攄高文意愜方展分緣慳俄離羣
離羣天一方世事胡可量君游京華春賢書觀國光余
抱河洛痛與匱還故鄉升沈旣殊致引領徒心傷

心傷誰與言忽忽祥琴彈詎因風波阻渝此金石堅寤
寐亡音微果枉惠瑤牋言探洞庭穴來泊胥江船

胥江清復清洞庭百里程如何整歸櫂闕茲金玉聲徒
勞鄭重意祇增離別情空谷儻存問歡會申平生
平生慕雅游肯睠山中幽放懷攬八極抗志凌千秋奚
必效萃鹿得食鳴相求助哉崇令德努力追前修

醉歌行呈外舅許秋濤先生

丈夫生不能金華殿中草鳳書又不能玉門關外騎龍
駒金莖露乾馬卿渴安用吹老玉門筭十年羈滯長安
道覓食飢鴻啄梁稻鷓鴣典盡黃金空卻道抽身苦不
早揭來補官得豫章仙風吹衣過故鄉故鄉酒徒共豪
飲末座容我終童狂白雲變幻如蒼狗風馬覓衣竟何
有舉杯酌天天不知且判爛醉杯中酒酒酣意氣如春
雷曾中墳起糟邱臺鶴翎全鍛有傲骨琴尾半焦無凡
材潑墨淋漓書素壁怒猊抉石秋鷹擊揮毫萬道走蛟
螭落紙一聲飛霹靂書罷撲筆歌離騷炎空灑雪天爲
高天公投壺玉女笑金蛇煜煜隨奔濤讀書萬卷成何

用枳棘從來困鷺鳳瑤闕珠宮不可攀月明空作游仙
夢夜深更酌風打窗螟更閣閣燈幢幢千杯百榼不快
意一口直欲吞章江章江之水排空舞瀉入懷問向南
吐化爲匡廬山頭千片雲散作彭蠡湖邊數州雨

奉送秋濤先生之官江右

秋風秋雨滿江鄉吹送雙鳧到豫章水驛較多山驛少
宦情殊短別情長全家南郭棲鴻廡此去西江綴雁行
郎軒舅氏同行它日儻躬逢勝餞可容宿構序滕王

舟行應過子陵灘可有鱸魚上釣竿半飽風颿收腳易
亂橫石筍轉頭難瀨前水駛漁謳少山外雲深鳥夢安

裁得羊裘休獨被一江煙雨綠蓑寒

周孝貞女詩

并敘

女常熟人父母沒立志不字撫弱弟成立弟又蚤卒
撫孤姪如其弟紡績以佐餽粥積五十載家累千金
其遇視北宮嬰兒子尤艱矣絃其事俟采風者

謂女曰孝匪奉雙親謂女曰貞匪稱未亡人生不幸作
女子身能以一身存一門五十年不嫁乃以貞孝聞

解一

父兮母兮皆歸地下有弟有弟煢煢一个姊去弟也寒

姊去弟也餓匪女之不嫁兮爲弟也不嫁

解二

弟也有婦

弟也有子女可以嫁矣天胡不弔弟也又死是呱呱者

將焉置此孤兒寡婦匪女何恃

解

有鳥曰請諳中夜火

起火光繞屋飛女曰事當從權宜左手挈婦右手抱兒

纏笄下堂曰免乎曰免矣賴我賢伯姬

解

朝饔夕飧左

宜右有教兒讀書爲兒取婦五十年相守弟今有後女

將含笑報地下父母

解

父母得愛女弟得一賢姊兒失

一賢姑服三年喪血兩眼枯兒也搶地呼兒今日始孤

六父老欽高風連牘上大府大府錄奇行一封達

帝所

帝曰嘉哉

恩綸錫汝巍巍綽楔大字題題曰貞孝古列女

解

剜肉操 并敘

孝婦曹常熟人姑患瘍創甚不可爲矣孝婦剜肉代膏傅之竟愈

剜肉補創一片肉香貼肉肉骨一腔熱血瀝血作汁肉

作膏紛絲續命無此牢解一上堂拜阿母阿母柳生肘延

醫來視醫束手上入缺盆不得收口合家燒香拜北斗

男前女後回首顧視不見新婦解二母萬福矣母噉粥矣

母睡熟矣創中纍纍生新肉矣延醫來視醫驚猜不知

此肉纍纍從何來解三合家拜向天天延吾母年疾呼新

婦來新婦偃偃行不前解四阿母聞之大驚疑袒臂眠之

心酸涕下如縷縻

五解

骨肉團樂稱觥舉
有兒有孫羅

列堂下兒上其牘
牘刺血寫我絃
此詩俟采風者

六解

將赴胸陽留別諸同人

曲直何勞訟升沈
不可論故人多惜我
此別最消魂亡
命緣家累刊章識
吏尊范滂親老矣
誰爲代晨昏

毗陵道中順風

昨晨張輕帆未晡
風打面子固任自然
順逆欣所便
今朝仍南風五兩
候羽扇兩岸高于山
一瞥去如電
瞳瞳曉日光擊檝
蘭陵縣卻到丹陽城
炊熟正朝飯
坦途本無營造物
每善變何況世上人
翻覆起方寸
菀枯異吹

嘯進退戒繫援篙工勿安眠須防颿腳轉

途次雜感

別岫孤雲一片歸誰憐遊子寸心違天荒似夢迷前後
路遠多歧認是非無那涼風吹葉下生憎秋雁背人飛
江魚值賤如泥土爭及家山采蕨薇

令史偏遭弱冠孤步兵無奈哭窮途空教別恨縈千縷
何處容身覓一壺石見水清魚避網月明風定雁銜蘆
誰家擣練寒砧急欲向湘潭問女媧

舟中卽景

秋聲滿天地游子獨何之社鼓羣鴉鬧江雲一鶴飢蘆

中煙外路葉落日斜時閒倚蓬窗坐長吟有所思
扁舟行不定四顧野蒼茫萬里江天白三更海月黃風
遲嫌路遠眠短覺宵長獨有還鄉夢時時繞北堂
岸闊寒潮涌山平曉靄沈天光臨水動秋色過江深獨
抱幽憂疾難爲離別心浮生搖落甚指點亂楓林

揚子橋

萬樹垂楊翳雙橋夾岸圍寒螿抱葉語江鳥學颿飛天
地增秋色煙波失落暉夜涼多水氣客子尙單衣

渡江書所見

浩然渡江來江城黯明滅行行指前途滿目色慘冽飢

民數十輩懸鶉衣百結負戴徙南邦老幼互提挈借問
爾胡爲鄉國輕離別灑淚前致辭欲語仍嗚咽今年淮
水大湖泛隄崩裂田廬漂沒盡如雨灌蛾垤存者各逃
生死者便永訣舍之不復顧家鄉長決絕縱教委蒿萊
幸免葬魚鼈命薄當被災生理焉可說

至尊今御宇宵衣望治切

廟堂計已周撫字理無缺胡爲淮陽郡歲歲告河決宣
房宮乍築瓠子口仍齧

國帑百萬糜累爾民力竭我讀河渠志三策緬前哲我
學周官書荒政十二設立國有大原區區豈補綴平生

慕杜陵自比稷與契見爾含瘡痍爲爾肝腸熱良久復
自笑杞憂一何拙陶然進一尊輕帆電光瞥

邗溝

邗溝通道久綿互接淮陽河水南流大平湖隔岸長修
隄糜國帑挽漕裕

神倉緬想潘公略前型未可忘

曉發淮安

寒郭帶殘月長淮斷晚霞樓臺雜蛟蜃更鼓絕蝦蟇日
上紅連海霜輕白誤沙跨驢休續夢子細路三叉

卽景口號

宿鳥靜深林嚴霜被平野衝寒客早行已有先行者

危隄

無主荒墳半夕陽飢鴉銜肉上帆檣陂塘亂颭菰蒲影
春碓時聞餅餌香良吏未遑興水利書生有志議河防
危隄獨坐歌鳴犢萬里波濤接混茫

曉發

殘月帶陂塘平橋印早霜河聲天上落海氣日邊涼魚
眼翻波赤雲頭罩霧黃衝寒行更早今日路彌長

早行東安大霧

回首重圍鬱不開前邨霧氣撲人來雲銜紅日滄波曉

浪卷黃河地軸迴吟罷勞勞霑袖底路迷左左陷溪隈
蹇驢欲策愁無力顛顛征顏劇可哀

胸城晚眺

峰前峰後抱迴環一角孤城海岱間四面風雲通鳥道
萬家煙火傍秋山潮淤荻港橫高堰日落沙堆指故關
南北此曾爭戰地

昇平無事成樓閒

城外滄波接大荒城頭一片月茫茫飛泉鳥護雙龍井
暮角人窺百雉牆方郵曬鹽霏雪白連邨刈稻失雲黃
天邊無限哀鴻影極目平原感慨長

山城見菊花

一年花事渾如夢到眼偏驚秋色來已分寒香隨歲盡
尙餘傲骨帶霜開朔風凜冽長吹帽落日登臨數舉杯
忽憶故園人去後定應零落委蒼苔

游碧霞宮

心香虔禮碧霞君山鬼遨嬉拜夕曛古柏龍髯銜冷月
前峰馬耳切寒雲波濤勢蓄秦東碣冰鐵聲留海外文
千古賢愚同一貉荒原楊樹白紛紛

借張萼樓敦悌李香谷遊石室步東坡和蔡景繁

韻

夫容洞中最深處舊是城南讀書路一朝辭親河洛問
操苦梁山泣風雨萬樹桃花撲地飛零落荒苔不知數
殞宮三帟集飛鴉總帳五更啼杜宇卻說輿匱涉波濤
溫序思歸葬邱墓年年寒食桃花開慟哭行楸酌芳醕
重來石室更淒涼公門桃李花無主黃雲獨鶴守石牀
白日飢鱸走巖戶海上三山事渺茫難覓仙查訪牛女
明月空停帝庭節飛霞誰按天魔舞韓門弟子盡豪傑
張籍李翱世無伍相攜出郭招符郎話到師恩意傾吐
自悲枯樹撼風煙豈有爰居戀鐘鼓攬轡澄清慕范滂
臨歧惆悵懷孫楚窈窕時從山鬼遊丁甯欲寄芳卿語

卽今漂泊轉蕭瑟，秋雨秋風聽如許。
江上夫容怨豔陽，山中桃核成塵土。
才疏空負託成書，德薄敢將詩述祖。
不堪重展傳經圖，坐對殘編撫今古。
松泉猶作讀書聲，彷彿靈衣來日暮。

香谷飲我

南山霧雨歎連遭，話舊尊前倍黯然。
沽酒百壺逢亥市，讀書千卷誤丁年。
蘭成身世悲枯樹，太白文章本謫仙。
捫蝨庵中

在州司馬治石曼卿故蹟

聽擊筑羽聲慷慨近幽燕。

樺燭光迴拜後堂，停觴忽下淚千行。
練裳冬月憐南客，宿草秋霜感北郎。
重抱殘經尋石室，尚餘遺愛在桐鄉。

香山老健微之歿，劔氣縱橫繞白楊。

令祖近亭先生時爲州司馬年逾七十

矣十

太息孤桐半死生，學書擊劔兩無成。
景真歷盡風波險，孟博從教月旦評。
憂患緣知游子賤，炎涼不改故人情。
青衫淪落天涯路，未聽琵琶淚已傾。

王海門丈涇緒招飲

海門先生南昌人爲海州尉能詩善飲

衙鼓萋萋燭已殘，停杯話舊淚闌干。
憶陪仙尉蒞蘆杖，共醉先生苜蓿盤。
丁卯春始識先生於海州學舍梅福高風存吏隱，鄭
虔無命老微官。嘗聞寶劔寒芒動，腸斷蘭成不忍看。

萼樓招余兄弟同香谷姚心田中孚集聽秋軒

如許秋聲不可聽
夫容城畔樹冥冥
相逢舊雨兼今雨
此會文星更酒星
率爾詠懷悲阮籍
陶然頌德學劉伶
婪杯擬酌山靈語
一曲離騷一涕零

寒逼綈袍張酒軍
西風轉瞬惜離羣
招來海上三山月
攜到江東一袖雲
欲賦幽通懷系氏
相期中說述河汾
龍門空有成書託
何日重紉石室文

攜手河梁空復情
再來海國訂鷗盟
脊令原上棲雙影
鴻雁風前話一聲
姚合清新無俗韻
李翱跌宕以詩名
就中張緒風流甚
吟牘署肢太瘦生

芻樓素有瘦沈之目

雄心欲著祖生鞭
不效昌黎屢乞憐
庾信誅茅仍七葉

彌衡懷刺已三年鵬圖南海逢希有風暖東門寓雜縣
捶碎玉壺吟未徹秋霜蕭颯望青天

王藝昀茂材宜古索詩戲作長句贈之

酒令如山張酒兵詩筒火急訂詩盟杯因恨別銜難放
句爲愁多對未成逃席追須防將種偏師攻不下長城
也知金谷難辭罰一夜安仁白髮生

胸城雜興

隱約霞城起郁洲蒼茫雲陣下龍湫亂峰千點海邊雨
長嘯一聲天外秋采藥好尋黃葉路銜寒難覓黑貂裘
美人誰把琅玕贈空學張衡賦四愁

黃兒墓草向黃昏秦碣千秋尚作門
永夜星河長伏枕
滿天風雪獨開尊
蓉城莫問三山事
石室空傷萬古魂
淒絕桐鄉舊游地
桃花零落更誰論

笳鼓聲高動戍樓
驚鴻影亂度城溝
黃雲罩海龍宮晚
白日銜山馬耳秋
雞跣舞殘小垂手
月明唱罷大刀頭
鄉關有信憑誰寄
一片寒砧暮未收

壓樹寒雲黯不開
荒城滿目見沙埃
夢隨煙雨江南去
詩挾風濤海外來
聽徹烏嗁空涕淚
錯疑蜃氣作樓臺
天涯又見關山月
歎息征人尚未回

胸陽紀事詩

余居胸陽十二年熟悉其風土久矣重游斯地世態
日新感慨之餘不能默默言雖不文亦風人之旨爾
皇天屯其膏驕陽滿秦東自冬徂春暮終日號狂風惟
見沙漠漠未覩雲霧霧虹藏久不見白日當晴空老蛟
臥不起深潭睡神龍健步憎旱魃推車休雷公倏然密
雲布於俟陰雨濃霾翳乍吹散蘊隆旋蟲蟲甌窶龜背
塝耕作妨三農故老仰天歎無麥民命窮占星望龍見
取水探龍宮舞雩帥女巫禮拜隨兒童吁嗟而祈雨哀
聲徹蒼穹州牧正開宴坎坎伐鼓鐘

瀕海水多鹹衆喊苦鹹澀城南雙龍井甘冽差可汲聊

足供淪烹未敢溷庖漏久旱泉源枯竟日得涓滴是時

斗建辰春意動淮北山城鮮名花郡齋多嘉植棗香亭

之前寄柯齋之側

亭齋俱在州治

蘭蕙揚幽芬牡丹豔國色放

衙笙歌沸高讌賓僚集百重錦障護一片香雲逼積旬
雨未下根枝皆槁立促發調水符有似催租急百石未
足供十夫不暇給泉竭羸其瓶鞭朴卽交及旁有田舍
翁對此長歎息漑茲一畦花奪彼千戶食

城東有大第鬱鬱何盤盤樓閣矗天起複道交迴環問
是誰家第此第屬太原太原今府吏富貴無比倫十三
爲小史二十專府權三十入貲選當得丞簿官家僮數

千指腴田連陌阡前堂陳寶玩後堂羅管絃沈沈府中
坐府吏壽萬年肩輿忽敏門當關問何人門外騶從答
云是州郎君郎君上聽事脫屣走遷延再拜獻卮酒願
翁壽萬年就席復長跼細語何繇繇兒奉大人命命告
吾翁前明農有一事願翁相周旋願笑謂郎君歸爲府
君言此事勿復陳府君壽萬年

十里聞酒香酒樓臨大路屋後倚女牆門前蔭嘉樹
玆列標題豐沛及汾潞游人游春還到此足每駐何來
一老兵顏色甚驕倨入門坐上坐清酒爲我酤一斗買
高粱百壺買花露紛綸進牛炙大嚼并雉兔傭保徵酒

錢酒錢排陌數脫我罾下刀且當酒錢付肆翁挽衣道
此物無用處老翁一何懦老兵一何怒赫赫中軍標下
令敢枝梧明年考官時看我作官去

有客跨怒馬手挑青絲韁摩挲七寶劍俠導重英槍問
客來何所客言生大梁自小喜椎剽縱橫充豫曷少長
慕猗頓貲財埒侯王謁來東海畔雄視淮北場遂專鹽
鹽利來往過六塘前飛雨黃鵠後載雙鯨黠奴百十
輩一一盡急裝下馬入逆旅逆旅皆驚惶爲客拂鞍韉
請客坐後堂椎牛買魚肉錯雜羅酒漿大婦調琵琶中
婦理箏簧小婦前上壽俠拜進一觴上客且安坐此樂

樂未央

愁雲連海氛綿互伊廬山山中有一士自小生孤單弱
冠娶新婦新婦家前邨婦家何鬱鬱婦姿何珊珊娶婦
才一月比翼憐文鴛晨粧花影豔宵杼燈光寒夜闌方
就寢門外何譁喧闐然破戶入三五輩少年署間白刃
插頭上白布纏自云奉府帖邨裏來捉人夫婦各驚起
大聲疾呼冤民實無罪過何用相拘牽羣盜相顧笑此
婦好容顏縛夫著堂柱縛婦著門闌婦跪前致詞聽妾
陳一言妾有嫁時衣一一箱中填翡翠雙條脫珊瑚間
木難上頭紫金鳳壓底青銅錢明珠三百顆顆顆紅絲

穿不足獻義士願報活命恩羣盜相顧嘻此婦實大賢
拔女頭上釵脫女耳上環嘉女辭旨令留女白璧完抽
刀斫牀足一散如雲煙凌晨告郡將郡將來門前裴哀
不敢捕捕者視斫痕

晨泊五丈河河邊數百戶隻日人趁墟喧闐聚行賈高
軒從北來僕從雜風雨傳呼聲甚厲觀者如環堵下車
坐當街羅拜列男女髻髮四十餘皤腹氣如虎里保饋
壺漿市魁上計簿某賢某不肖一一爲覩縷某也惰當
罰某也功宜敘中有一少年顏色獨慘沮叩頭謝罪過
坐上拍案怒罄女貲難償擢女髮難數鞭女背一百後

犯不貸女諾諾復爾爾解衣受捶楚須臾處分畢雜還
進酒脯從容上車去日色正停午借問道旁人向者何
官府搖手道禁聲附耳作小語此是州茂材此是吾集
主

篳篥

篳篥一聲哀寒雲萬仞墮秋風人中酒落日客登臺海
氣連潮上沙聲卷雁來側身南望處腸斷憶蘭陔
慷慨看天嘯艱難斫地歌流光驚歲序失足怕風波日
暮豺聲合山荒虎跡多索居殊寂寂中夜故人過

簡香谷

搖落天涯歲暮時，商飈中夜動愁思。
未甘見笑同魚目，尚欲留名惜豹皮。
傳世文章惟白也，少年瀟灑有宗之。
他時珠樹栖丹鳳，可許鷓鴣借一枝。

題王藝叟江南詞後并示香谷

譜就江南絕妙詞，王郎愁緒正如絲。
尊前莫唱家山好，腸斷青楓月落時。

夫容洞外舊停驂，重約芳卿夢裏探。
彈徹胡琴海潮上，不堪回首望江南。

橘奴千顆乍經霜，榕樹峰高接故鄉。
夢繞江南更南去，秋風吹雨上桄榔。

香谷閩人

卽事

披裘不受朔風侵，孤負延陵空見尋。
季布何妨輕一諾，魯連豈肯受千金。
籠中鶴有乘軒志，濠上魚無食餌心。
莫笑吾生終未化，豈因淮海變微禽。

得失

得失雞蟲孰汝親，六根纏縛豈前因。
可知毛遂無餘子，莫笑徐陵不識人。
海上蜻能無我相，夢中蟻亦可憐身。
不須舉扇還遮面，未必元規尚有塵。

長相思

長相思在何許，乃在陽臺之南峰，
洞庭之北渚，波鱗鱗。

兮媵魚山杳杳兮多虎霧冥冥以晦靄靄填填而震怒
秋聲一夜起秋浦金支翠旗下漢女陽侯抗音馮夷鼓
黑螭歛簫黃虬舞幽篁終日不見人欲往從之不得語
長相思淚如雨

野田黃雀行

遊莫逐雕陵鵲棲莫近瑤臺鶴瑤臺露冷鍛羽翰雕陵
風高遇矰繳黃雲夾隴梁稻肥關河阻絕不得飛鷗波
浩蕩鳥道嶮巖鷹鷂下視尉羅高施黃雀行聲正悲野
田餘粒啄欲盡蓬蒿滿日將安之

昏鴉

昏鴉依樹噪憐爾欲何之落葉疏林外天寒日暮時
邨荒銜肉過雨細立枝危努力避繪繳人情正嶮巖

雪

檻外舞猶急檐端飛不齊一從辭碧落遂爾隔雲泥著
樹形難定隨風勢欲低紅鑪如可試終勝墮荒谿

感舊篇贈李大香谷

乘楂亭子俯滄溟環玦微茫一髮青舊種桃花推半刺

令祖近亭先生爲州司馬新開石室憶傳經憶昔胸陽留滯日謫仙

才調知無匹太學人爭御李膺鬱林碑好摹崔逸雲臺山鬱

林觀磨崖碑唐州司馬子崔逸八分書我也鱣堂效鯉趨流蘇寶蓋屢停

車揚修纜解陳家果趙括空能讀父書西望長安愁不見
見神交已久心常戀南山七日未窺斑北海三年求識
面僂指蘭成射策年相逢海國喜前緣解成進學書三
上詩補循陔笙六篇招攜同躅城南路石鼓歌殘叩銅
鼓鐵馬冰車斷續聲江風海雨淒涼語過從朝暮輒論
文馬耳峰高映夕曛白也詩歌傾賀監習之才地擅韓
門春深南浦恩恩別從此萍蹤相隔絕駿馬長嘶冀北
風孤松獨倚秦東月苜蓿荒蕪橡實空杏壇倏忽起悲
風修文路阻重泉下發讖期占四月中成書受託空三
歎難繼龍門與虎觀馬遷遊洛正辭親班孟偏孤纜弱

冠讀禮依然日過庭案頭尚有讀書螢殞宮一樹枯楊
白講席三更鬼火青秋深河鯉傳書至帖看泥金初破
涕敬告南豐一瓣香而今方叔新登第三十成名莫歎
遲應憐鸞翻鍛襪褫當君席帽離身日正我牛車挽匱
時重趼千里還鄉葬歸途又值邗溝漲壓地黃雲卷怒
濤連天黑月翻厖浪歷盡風波始得歸歸來涕泗溼麻
衣墓田葉落雙魚拂茅屋苔荒一鶴飛碧桃無主棠梨
謝淒絕秋風春雨夜秋風旅雁斷庚郵春雨慈烏嗥丙
舍丙舍松楸間薜蘿文狸赤豹日經過幽篁灑淚悲風
木薤露哀歌廢蓼莪元廬乍啟歸塋兆馬鬣崇封魂魄

杳蒿里從今掩夜臺
瀧岡何日題阡表
一枝且自託深林
未報春暉寸草心
願影樂樂除素鞵
成聲切切理焦琴
自憐塊處同桃梗
指點青楓吾谷靜
舊雨飄零逐斷蓬
晨星寥落存孤影
珠玉隨風落九天
江南蓮葉正田田
虎阜乍停書畫舫
胥江還泊孝廉船
竭來打槳吳趨道
咫尺天涯惜芳草
自是停雲我賦遲
不關落月君歸早
別緒愁悰不可刪
昌門楊柳那堪攀
誰知飛倦天邊鳥
又被風吹出故山
無端獬犬憎蘭佩
千里俄來櫟陽遠
重遊東海感蒼茫
惜別南陽辭慷慨
班荆話舊意縱橫
邀我高堂拜曼卿
淪落應揮司馬淚
艱難方見故人

清攜手相將尋石屋雲關深鎖松花綠古瓦霜濃紅鴿
棲空階霧翳蒼颺宿陵谷遷移指郁洲蓬萊無路涌吞
舟高公島畔魚龍晚孔望山頭草木秋海中蜃氣成煙
霧荒山魍魅迷前路策蹇休猜薏苡裝垂竿難買珊瑚
樹吟成莊舄對南冠捫蝨庵中共倚闌赤弩浮樽蛇陣
曲青萍出匣電光寒只今歲暮方回轍關山隔絕紛紛
雪燭影闌珊月影低鼓聲悽斷簫聲咽此去應過胯下
橋長淮湓涌蹙波濤城東漂母能分食市上王孫怯帶
刀回首鴻泥竟如此浮生聚散隨流水解劔甯忘漁丈
人買絲好繡佳公子愁雲縹緲起雲臺落日悲笳雁影

來他年燕市重沽酒擊筑狂歌劇可哀

發胸城回望雲臺山淒然有感

亭亭迴指是雲臺丹幟青屏四面開豈惜今朝成遠別
更知何日又重來飛時祇恐隨靈鷲沈去應難辨劫灰
還勸麻姑到東海并鋤黃竹不須栽

泊中正疇

野岸橫千頃沙灘合四圍蘆花飛不定鷗鳥近忘機舟
子橫篙臥漁人打網歸此中多樂意靜坐對斜暉

舟行大伊山道中

蒼莽塵沙裏孤舟一葉來濤衝煙陣立柁翦浪花開天

地穹廬合風雲暮角哀伊廬知遠近指點亂峰堆
樹鎖千山霧帆分兩面風凍雲橫大野飢隼下長空日
落邨初暝潮歸浦不通水程今百里回首憶秦東

未至安東三十里日薄西山矣邨路崎嶇口占二

律

客程猶卅里天半已斜陽曠野迷平渡驚飈撲大荒緇
衣染沙白紅葉帶雲黃何必向京洛始嗟前路長
暝色壓吟鞍誰憐行路難近河風力壯薄暮日光寒蜚
鳥投林急飢鳥啄肉殘豺狼當路立策蹇莫盤桓

侵晨

解鞶方薄暮策蹇又侵晨野熟多堆稻邨荒不見人殘
霜留爪印鎮日兀尻輪髀肉消磨盡風塵感慨頻

旅寓淮陰

平生作計歎迂疏獨守殘經破五車李廣數奇當上簿
賈生年少欲投書三冬雉入淮爲蜃一斗波難壑縱魚
便擬乘風訴閭闔豐隆無意竟何如

自題秋風感別圖

三洲鐘鼓浪湯湯萬卷琳琅石室涼江上黃蘆迷曉月
山中丹橘闌新霜故人容我如張儉老母教兒學范滂
擬向鬱洲就根矩休將招隱問淮王

有酒如淮醉老支清流祇畏濁流知觀濤我欲從枚乘
賣餅人誰識趙歧近海樓臺驚幻夢橫江風雪阻歸期
不堪重向圖中認愁絕秋風篋一枝

淮陰僧寮一夕有武弁數人見訪固請締交僕病
未能從也感其意爲作長歌

精廬闐寂依釣臺蒹葭繞廬門不開燈前苦吟聞剝啄
足音忽訝楚然來啟闢肅客攝衣起鵬弁雄冠二三子
爲言此聽讀書聲定有奇才貌青兕執手高譚大歡喜
縞紵請從今日始有酒須傾胯下橋揮金且過淮陰市
我生二十無知已四海如君今有幾當時若見韓王孫

肯讓鄒侯識國士惜哉搖落已如此武達文通竟何俟
多謝殷勤脫寶刀語客且休吾倦矣于嗟乎人生相值
如浮萍封侯骨相術不靈馬周獨向肆中酌伍喬空夢
天邊星齋堂鐘鳴客徑去挑鐙且誦陰符經

悲歌行

我今鬱鬱久居此土胡爲哉鶴囚籠中燕巢幕魯門風
暖將爲災羽翰摧殘六翮折不能乘雲驂覬容與遨戲
乎九垓鷓鴣過鼠嚇鳳鳥爲鳩媒荆璞遭跖足隋珠含
禍胎竹以直而伐蘭以薰而摧古來豪傑迤邐杌梲不
得志橫被蠨獵蛭螾相疑猜飛霜擊地鄒衍恨銷金鑠

骨文通哀男兒成名患不早安能寂寞長煙苔隆冬雪
花片片吹落淮南宅何人高築黃金臺夢中忽然罾問
寶劍化龍去覺來灑淚成瓊瑰鎗中餘藥雞犬亦舐盡
不如倒取玻璃盃凌晨步上危隄望黃河之水奔騰傾
注而東來天關撼動地軸側盤渦轂轉如奔雷洪濤洶
涌浪澎湃觸石激埼何喧厯驚風駭森翳白日噴薄雲
霧蜚沙埃木龍石埽撐拄鼉鼉蛟螭不敢上但見溟渤
淼漫潰漚泮汗陰雪而陽開

國家治河兼挽漕束以高岸雲崔嵬歲糜帑金百萬萬
厓隙泐嶮還崩隕撫卷空懷賈讓策論世緬想王尊才

河渠書并水經注脈絡指掌誠恢恢不朽事業貴自立
不然委謝隨蒿萊流光易戢身易老齷齪守此真凡材
曾懷鬱壹誰與語茫茫獨立空裒裒嗚呼我今鬱鬱久
居此土胡爲哉

發淮安

檣烏聲作作斜拂女牆過四野星光大三洲雁影多篁
青狐鬼嘯月黑虎偃歌擬就前邨泊還愁蜃氣譌

阻冰寶應

天際驚聞十月雷銀山遙擁亂流來黃河浪迸聲初壯
白日暉沈凍不開放溜祇通漸瀼瀼積麥彌望雪皚皚

側身斷岸前途隔彈鋏商歌迴自哀

寶應

湖水環其左邗溝轉向西萬家當孔道百雉隱危隄地
少舟爲宅徭多吏牧羝哀鴻中夜詔四野有窮黎

泊舟寶應南

并敘

庚午九秋余兄弟自海州輿匿旋里月幾望次淮陰
迺舍車而舟焉清晨發櫂順流直下日未晡已軼寶
應而南忽淮水異漲邗溝東潰舟距缺口不及里許
全家性命幾葬魚腹植杙維舟進退罔措老母憂傷
頭髮盡白殆將而月矣適大吏來視河鑿隄通湖以

引糧艘挽舟從之懂而後免重泊故處盡然傷心感
賦一章潛焉出涕

八寶城南甍社東記懸性命亂流中舟沈幾欲從廉范
水退何嘗爲庾公卅口幸歸吳郡土一颿又試楚州風
沿隄枯柳如相慰曾見西華哭路窮

邗溝道中

一颿飛鳥過兩岸亂流分湖氣吞殘日江潮卷暮雲沙
驚黃浩浩凌斷白紛紛孤雁投何處哀鳴不可聞

泊瓜步壘前韻

江城循岸合江水向人分小泊依瓜步長歌遏曉雲烏

鴉聲聒聒蘆荻影紛紛空憶桓伊笛千年不復聞

示內

相離思若愒相見痛方深勞汝三更夢知余一寸心張
儀空有舌蘇季已無金一笑推窗看寒梅發故林
折來當歲暮斗酒就卿謀對此晨葩潔因之夕膳脩慈
烏啼往復雛鳳語清柔願保天倫樂相依共白頭

知止齋詩集卷第二

常熟 翁心存 二銘

古今體詩一百十六首

起癸酉館張氏甲戌館趙叔才先生家歲大饑餽粥不繼

乙亥仍館趙氏作

孤館不寐用東坡次王鞏獨眠韻

癸酉

騎龍上天飛尺木手摘春星大如粟素娥珊珊鳴佩玉
驂鸞邀我月中宿天風吹夢斷不續雲車載愁折車軸
三更寒雨打枯竹簾波生霧燭光綠

巫山高巒前韻

陽烏呀呀登若木涼蟾瞪目蓄金粟羲和珊鞭敲紅玉

吳質倚樹廣寒宿日車月輪走相續巫山高高翻折軸
麻姑東海栽黃竹兩鬢如霜蹙蛾綠

湘煙曲再疊前韻

金猊蒸盡檀梅木繡佛長齋禮金粟盤中詩句落珠玉
門外雲塘鴻瀟宿滿水東流不可續欲借并刀鍊車軸
淚痕斑斑溼湘竹湘山橫黛湘煙綠

寄外舅秋濤先生時先生奉檄往南贛

書報尊前慰所思開緘定值仲春時遙知庾嶺梅花盡
轉寄江南第一枝

十八灘頭深復深鬱孤臺下月沈沈鯉魚若過灘前去

一字真堪抵萬金

入春以來濃陰不解仲春望後月忽晴朗喜而有
作

天公畢竟怕無情破例今宵也放晴掃盡絮雲千片溼
洞開銀闕萬尋明半春花事渾如夢二月寒波分外清
料得常娥應恨晚落梅如雪撲簾旌

冰壺淨洗絕塵埃快意今年第一回萬里乾坤凝皓魄
半天風露下瑤臺縱教明日光如舊卻憶前宵霧不開
莫放光陰容易過當頭明月手中盃

二月十七夜月

連日雨迷漫飛來白玉盤如何光皎潔已過影團樂皓
魄愁難補清輝幸未殘盈盈十五夜爭許外人看

春雨感懷

春雨已愁絕况當寒食時更兼懷遠道何以慰相思風
定落花急霧深飛絮遲因之夢蝴蝶明月照空枝

清明苦雨有懷石室諸君子

萬樹桃花石室開年時此日倒尊罍竹鑪試茗分新火
銅鼓敲詩和晚雷一自仙人歸碧落祇今遺跡委蒼苔
江風海雨淒涼甚憶著停雲首重回

曉晴

亦知晴更好底事太怱怱雲擁峰頭白煙烘日腳紅清
光纔北渚暝色又東風一夜瀟瀟雨明朝路不通

復雨

蚤晴晴不透涼氣似秋陰又釀一天雨終成三日霖殘
更聽蛤吠孤篋寫龍吟夢繞飛花溼沈沈不可尋

檢舊詩淒然有述

笥束影何瘦蟲號聲自寒吟成新句易改到舊詩難莫
鬪千篇富先求一字安錦囊羞澀甚生怕嘔心肝
自抱龍門痛回思鯉對時城南符學進海外過文奇一
慟承遺訓三年廢業詩祇今繙舊藁血淚染烏絲

張孝婦詩

鴝鵒月夜跼蘿徑山鬼乘狸索禳禳張家老母中鬼病
張家有婦祈母命磨刀寘水焚靈香香煙一縷燭兩行
誓將割肉代醫藥九關夜奏通天章是時月黑風雨急
三更無人影孤立叩頭拜禱北斗垣精誠動天天亦泣
拜罷亟起手握刀刀光電閃星辰搖左手攘袂勒錦條
右手揮刀起怒颺剗肉一片如胡桃臂血歎薄飛紅潮
淋漓濺灑三尺高急裂襟幅四巾包擲刀插地祇鬼號
以肉抵几色不撓酌湯注釜慢火熬洗肉投釜調作膏
成姑醱之如醱膠二豎退舍服烏逃于嗟乎吾聞介推

稱義士割股啖君君不死又聞張密稱孝子割臂進母
母疾起此事竟出閨閣中孝婦之名不朽矣君不見張
家奇孝萃一門生女又作代死人

曉起卽事

雨洗山骨青日透煙光紫褰衣弄荷珠珠翻衣濺水

遣興

嘉樹扶疏靜掩關似聞簾外雨潺潺奇書合讓才人讀
清福能消永晝閒賸有名心難免俗只除詩膽尚嫌獠
倦來欹枕尋仙夢夢到蓬萊第一山

九日偕曾石谿福謙陳梅江理兩茂才集趙叔才

上舍元愷總宜山房

手把清尊望翠微，登臨力倦惜芳菲。
山如有意留青眼，人自無言對白衣。
酌酒可能催早鞠，循陔只願駐斜暉。
商飈一夜林前到，落葉冥鴻下上飛。

榜發梅江登賢書石谿中副車

簡梅江孝廉

十歲長于我，知君我最真。
無慚三世德，莫負百年身。
立志非謀食，微名豈救貧。
會當登要路，風俗坐還淳。
秋風曾小別，爲我補秋圖。
江海片帆遠，冰霜一客孤。
賓鴻懷故侶，退鷁感今吾。
他日重披覽，鷗盟記得無。

感事

九服歸

皇極三辰拱

帝居如何揮白刃竟敢犯

丹除幟立黃巾號門填紫草車由來畿輔地防衛未應

疎

沴氣環黃道妖氛貫

紫垣赤丸爭斫吏白土竟書門豈有飢寒迫渾忘

教養恩蕪芽萌已久誰肯進危言

白挺窺

宮省蠡旗傳

苑牆

液池傳信礮

朵殿發

神槍

智勇

天心協明威

帝命彰霆聲聞一震狐兔敢潛藏

祇謁

三陵後安驅

萬乘回百靈森翊衛一騎縛渠魁不有匡時略誰知濟

變才

九門開詖蕩蚤已淨塵埃

尋孛前年見兵占充豫州黨連十常侍星動五諸侯赤
縣今無警潢池盜未休

王師聞奏捷蚤晚滑臺收

責已申

明詔

求言訪直臣歡嘽騰帟宇涕泣捧

恩綸革面安遺孽淪肌感

至仁敬共

箴有位勛爾戒因循

重有感

左道傳青領凶徒聚黑山已殲荆蜀外又煽濟河間豺
虎中原徧貔貅列戍閒

承平寬大政鑄象漏神姦

虺毒

京畿伏狐鳴大澤呼儻教同日發或恐追

天誅賴有神明宰先檢桀黠徒功存

宗社鉅烈烈况捐軀

殺氣纏河朔昏霾起滑州占星環貫索禡燾祭蚩尤殺

魄風霆迓貞心日月侔崇祠褒卞壺大義炳千秋
北望黎陽戍連烽過大伾令丞能仗節慷慨共登陴百
戰摧封豕孤城臥老罷酬庸雖未及簡策姓名垂

指日申

天討膚功奏閭臣長圍空四合逆

命已三旬節鉞徵盧植韜鈴借寇恂清河威望重破膽
說江神

一鼓堅城克

皇威撻伐張荒津開白馬小劫過紅羊從此煙塵息欣
看玉鏡光瘡痍猶未復綏輯在循良

新樂府四章

學使陳公試士作

甲戌

相馬篇 物色駿材也

秋風獵獵秋草黃萬馬昂首高騰驤一馬歷塊誤一蹶
悲鳴錯莫臥道旁雙瞳電閃氣凌厲五華雲被神飛揚
于嗟女相非尋常爲女拂拭生輝光玉鞍珠勒金絲韁
逝將致女貢玉堂中途逢伯樂呼馬而告之爾志倜儻
爾精權奇爾跼鑣轡爾厭馬羈朝浴樽桑夕稅咸池爾
胡不馳驅服秋御而狂奔踈泛駕爲媚女骨節弭女姿
駟衡衛轂會有時君不見

金馬門高高百尺門外七尺八尺金馬式

識曲引 辨正文體也

楚引停繁音吳歛仁緩唱請爲一曲清商歌歌聲響遏
行雲上正聲微茫新聲新引商刻羽空入神廣場掄袂
朱脣破坐而聽者無一人乞君聽邀君顧不惜歌聲三
日繞梁飛願得知音指點曲中誤擊齊瑟彈秦箏歛玉
篋炙銀笙轉喉變調爲新聲情到情至移人情移人情
一再鼓發揚荷奏激楚湘君揚旂天魔舞姮娥抗音冰
娥語太容點頭按仙譜天花簌簌落紅雨昨日法曲頒
太常八風回回音嗶嗶伶倫識其曲曰此曲學鳳皇奏
之

明光一片諧宮商

書估行 購求異書也

生不能立致祕書賜萬卷亦當坐擁異書列百城不然
遠從雞林賈不然學作童子鳴書香可療饑書味可救
渴攤書書牀塞書屋書估一生書裏活不願借書換酒
券不願獻書拜高官願向嫵環福地住盡發寶笈瑤編
看壁中簡帳中本壺盧中漢書寶之莫蠹損春江三月
書船開離騷一篇酒一盃旁人錯把孝廉認書臺高等
黃金臺書估樂復樂書田歲播穫邢家小兒強解事楊
家老子空投閣笑殺偷書祖孝徵祇須一部華林略于

嗟乎絳雲樓瓦飛雲煙汲古閣址成閒田不如歲誦二
十二萬言孝先經笥書便便撐腸拄腹卷五千濃香薰
薇露盥

國家方開崇文館

河兵謠 咨訪河務也

鳴金鉦擊鼙鼓催人夫唱邪許大家齊聲用力舉萬斛
金錢一尺土一尺隄陷一尺補上頭有官府女休女臥
不貸女朝搶險外河隄暮搶險裏河隄朝朝暮暮腹苦
饑手足皸瘃面目黧蒼然一聲如崩雷黃河之水天上
來木龍石埽撐拄鼉鼉蛟龍不敢上餘勢鬱怒千縈回

三月桃花汛六月礬山水糧艘過盡十月中舉手加額
普慶安瀾矣朝來出營房官府告示何煌煌銀一分泥
一筐銀一百柴一方歲請帑銀數百萬盡輸河庫完隄
防河防完河兵多昔防盜今防河安得三千鐵弩手一
齊射住黃河波萬古不動如山阿黃河捧土如可塞老
兵願先以身填河死報

國

二月望後一日大雪學使陳公希曾集試者五十
六人命賦勵志酬知詩四章以舉實爲秋爲韻

惟

皇撫寰區

宵旰勵

當二雨兵洗機槍風教式樽俎使星炳牛斗銜

命莅黷序品望重李韓手筆推燕許挹將西江波灑作
南邦雨宏開廣廈庇兼采藥囊貯四知絕餽金三載陋
刻楮庶收大雅材用以副盛舉

三吳文物地先民事著述論文士衡才賦雪思光筆年
來趨嚮歧末學竟佔畢蟬噪和以千竽吹聽少一雖歌
白雪辭誰操回春律卿雲麗會霄夜光罔遺失珠玉落
九天隨風化六出共摛庶子華毋忘家丞實

橐筆來鎖院節屆中和時祥雲積階城習習輕風吹粉
廊列多士濟濟振羽儀騰身跨白鳳觸目信可師願履
中和節夷坦行不危願抱冰雪心清白涅不緇願五十
六人此志共矢之嗤佗聚星堂白戰空爾爲

鯁生實不材弱冠事壯游防身倚一劍豪氣隘九州仲
華公未拜正平薦不收竭來謁宗匠拂拭登膺舟和風
扇小草廣海納細流雕蟲媿薄技知己恩難酬師門許
立雪請上百尺樓商略天人際事業垂千秋

論詩絕句十八首

應試作

一代文章正始音漁洋三昧印禪心波羅蜜果都參透

卻怪隨園論太深

王漁洋

鴻博詞科侍從臣
曝書亭集映千春華
嚴彈指樓臺裏
幾箇詞人是學人

朱竹垞

精醇第一竿
愚山古格高風孰可攀
字字性靈清到骨
凡塵一例盡教刪

施愚山

唱徹崎嶇蜀道難
荔裳身世累微官
宦途人海風波險
收入詩囊當譜看

宋荔裳

紅豆山莊蹟已沈
虞山詩學數誰深
默庵太峻湘靈僻
衣鉢終須屬鈍吟

馮鈍吟

絕妙婁東十子詞
就中願許更交推
殘膏賸馥皆珠玉

那不傾心祭酒詩 顧伊人許九日

文格真堪繼柳韓詩才欲比阮亭難堯峰全集分明在

莫把詩文一例看 汪鈍翁

日下論詩孰最工魚魚雅雅起隕風一時餘子應低首

除卻綿津數考功 顧脩采宋牧仲

毛公真作五經師諧語譚詩足解頤駁得髯翁尤絕倒

春江水暖鴨先知 毛西河

月明空唱大刀環鐵馬冰車出漢關蕭史青門成絕調

又傳一曲浚稽山 吳漢槎

非非想本自天開一卷談龍足辨才米釀酒成花釀蜜

箇中三昧孰參來

趙秋谷

重現髯蘇說法身靈臺一點絕纖塵白描好手傳神句

真箇華嚴法界人

查初白

浙派誰教別體裁先生元是出羣材小倉山老詩中虎

曾到詩壇下拜來

厲樊榭

承明通籍鬢毛斑晚達如公遇亦艱四卷原詩師說在

白頭風雨說橫山

沈歸愚

才名海內重袁絲開出尖新派一支還誦公詩作公贊

不相菲薄不相師

袁簡齋

抗衡各各樹麾幢此事推袁未肯降石破天驚忠雅集

真教一口吸西江

蔣心餘

宏詞全集已叢殘，葦碧軒詩半不完。賴有暨陽徵士在，

滿江風雨一蓑寒。

家齊堂

刪除綺麗見天真，誰作青蓮後替身。擬向詩仙搔首問，
千秋定論付何人。

奉題許助軒舅氏西江游草用集中除夕韻

歷盡羊腸百八盤，未吟愁已上眉端。文能奪命終非福，
貧只依人事本難。去日煙雲千里過，歸來風雪一身寒。

編詩甲子從頭起，莫道詩情老易闌。

舅氏今年六十

得外舅秋濤先生書奉答

彩雲一朵到蓬盧欲激西江涸轍餘臣朔苦飢懷少肉
小人有母食無魚宦非得計何論客身未成名且讀書
聞道

明光方試士故人今已坐高車

旱

下酉成龜壙初庚歎魑驕溝車空挂屋海汊不通潮水
利應難復妖氛或未消桑林

祈禱切誰爲翊

昌朝

趙氏廢園雙桂歌

空山七月秋風涼風吹叢桂開山房山前山後擣芳麝
散作十里天花香花香浸到花深處石路濛濛慕香霧
主人邀我去看花遙指前邨南阮樹南阮蕭條家絕貧
廢園池館委荒榛割來半晦猶留券賸有雙株未作薪
隔園花氣先薰客入園悅入花王國萬斛濃蒸玉露華
四垂飽孕金精色一株撐破青溟濛一株偃蹇迎秋風
連蜷枝老千秋碧麗殺心含一縷紅落英簸簸飛塵土
漂零似謫花無主拾取殘花坐石磯花前爲我低徊語
此園締構百餘年此樹栽培賴主賢地近桃源花似錦
家臨慈澗屋如船春缸釀就中山酒秋畦翦得林宗韭

巷外多停長者車門前自種先生柳每到花開花謝時
塌來花下賦新詩酒仙歌罷飛千竚繡佛龕前供一枝
誰知榮落須臾變浮生彈指如流電金粟前身夙夢醒
椒漿此際幽宮奠一片冰輪化彩霞孤兒出贅傍侬家
素娥耐冷初生魄桂子飄香待茁芽園林地僻無人迹
薜蘿綠砌塵凝席僵石全移到漑家幽蘭半賣羅含宅
從此谿山日日非有誰還解惜芳菲春風幾度翻紅藥
秋水三更浸紫薇惟有此花香不改年年花發如金海
黃雪漫天月不波白楊嘯雨人何在話到傷心感莫禁
含辛擊涕幾霑襟誰將示現維摩影寫入淒涼山鬼吟

我聞此語三歎息賦就長歌愁點筆七葉空增枯樹悲
八公苦乏留人術更憶東郊也是園黃金十二鑄飛仙
金魚鎖斷無消息靜對涼蟾深閉門

吾家東郭逸園錢遊王先生嘗居之

名也是園今歸蘇氏人猶呼爲翁園中有十二桂軒

夜坐總宜山房桂花下聽李小霞山人馨彈琴

老幹得山氣濃芬鬱秋陰清微悟至理幽曠涵道心良
夜招勝侶坐石調素琴一彈復再鼓泠泠滌煩襟空山
萬籟寂發此太古音馥郁味逾澹攫醅意轉深仰視星
月皎不知風露侵瑤華如可寄招隱庶自今

秋夜汎舟石湖

我騎白鶴浮滄溟回廳倒挂垂虹亭長橋駕空浪澎湃
花山兩道長眉青前途指石湖冥冥弄煙霧買得蜻蛉
一葉輕飄然竟入湖中去沙棠之榼雲母舟銀笙翠管
坐兩頭美人一去眇天末半輪明月湖波流湖波茫茫
如此大雨漿如飛望波拜楞伽山色背人歸影射湖心
只如芥高秋九月湖氣涼蘆花瑟瑟驚飛霜風鬟霧鬢
杳難卽但見煙外雙兜央船頭仙筵踞煙破依稀月府
歌霓裳琉璃一片四圍合便欲跳入壺中藏鯉魚風起
船尾立揭起篷窗浪花入雁外青天分外青星斗無聲
插波溼我欲左攜陸魯望右挽張季鷹斫鱸射鴨誇精

能木蘭舟上乘風升或言古人千載不可見試看農圃
堂陟蟠枯藤三更轉櫂湖山靜極浦漁舟載笭箬歸到
紅塵十丈中夢魂猶帶吳江冷羨煞當年范大夫扁舟
此去作陶朱萬金散盡身無事準擬秋風泛五湖

次韻曾韻卿茂才祐謙秋夜見懷之作

幾年抱刺走秋風頑鳥投人語未工迎鮒轍乾思大海
相牛經細辨陰虹空將詩句吟三上絕少文辭送五窮
一事傲君筋骨健賃春還可學梁鴻

打稻辭

把稻稻穗輕打稻稻牀仰不聞墜穀聲但聞耒板響

叔才招同單師白學傅孫仲直文杓兩茂材小集
總宜山房食蟹師白詩先成走筆和之

昆湖蟹美誇吾鄉金爪獨產雲和塘豈知秋來陂澤竭
論價欲比兼金昂籌鐙椽斲不可致幽夢一片飛菰蔣
山人山居酒新醉招客夜飲過三商腥風怪雨撲燈燭
滿盤赤玉輪困裝擎來左右更羅列椒橙醬醋鹽齋薑
老饕食指久跳動伸手亂揣圍尖忙雙螯先拗兔夾舌
半殼微露欣無腸金鑊銛利刮翳膜玉膏肥膩流脂肪
腦髓腳髓抉剔盡要從四角周中央以手佐口口代手
一擘再吸傾瓊漿中食把酒漱牙齒三歎此樂非尋常

去年潢池警兇豫其民躁擾毛而方怒盡井底自尊大
妄效彭越稱侯王雷雨甲坼象占解

天戈迅指消欃槍鯨鯢就烹妖蜃殄春波滉漾蘇疲尪
稍銷金甲事糧棘還似枯蟹迎風僵今年亢旱地龜坼
江南江北愁飢荒一畝五斗粟不穫恐少子粒輸官倉
况聞湖面抗租稅舉足觸網煩桁楊明年稻蟹不遺種
吾徒那免餐秕糠卽今飽啖此亦足口角何暇含雌黃
爾雅熟讀竟奚益蟲魚箋注譌偏旁監州無福不願作
酒池遼遠思燉煌得蟹不飲飲不醉明月恹煞人清狂
襟邊袖底溼淋漓一口直欲吞千觴呼童秉燭更拭几

但見牆角堆蟹匡客飽且莫遽逃席蟹鬚洗手煎蘭湯
主人夜炊粥方熟汗流一啜香秬香

師白性不飲以予詩有一口千觴之句作詩見詡
戲疊元韻奉答

樊仙無才但弄脣長卿入夢助詩新明知妄語元虛憍
聊學曹洪諱倩人

金波激盞繞盃脣雙戟欣看拔隊新時復中之飢欲死
臣今壯已不如人

卷耳清才陋補脣慣拈險韻鬪尖新一雙白眼終朝醒
飽看橫行世上人

設想

一片鴻濛啟祕雨
天根月窟露空嵌
宅時須乞媯皇補
重待詩人逐日劖

高閣

禮鼠銜書觸短檠
蘭膏無燄半牀明
樹環高閣兜風勢
人擁孤衾數雨聲
結習只愁多識字
救荒無計况躬耕
城南二頃吾何有
且喜官租累尚輕

承歡

強自抽書把悶排
晨餐未辦拾枯柴
雨催菊意黃三徑
風卷葉聲紅半階
乞米帖工兒學字
典衣券厚婦捐釵

安貧卽是承歡法，須信吾生自有涯。

黃韻山文泰巡檐索笑圖

杜陵野老家，襄陽梅花萬樹環。草堂東西南北歸不得，
一生孤負梅花香。襄陽小兒齊拍手，笑煞老去詩人狂。
東游吳越歷齊趙，南陟天姥浮沅湘。卻從秦川西入蜀，
芒鞋踏徧蠶叢。百花潭邊構新宅，誅鋤茅茷開榛荒。
壯心已隨短髮短，託命猶賸長鏡長。脊令原冷思弟妹，
鴛鴦飛去隨鴉鷓。夢中繁花忽照眼，覺來羈滯仍江鄉。
遠枝健步不可致，徑欲捆載煩羸綱。苦吟詩句羨何遜，
安得東閣開雜揚。先生愛梅兼愛畫，詩學子美格老蒼。

廿年隻身走萬里梅花冷笑詩人忙一官漂泊到巴蜀
峭颿徑進淩瞿塘占星益部少驛使寒香寫入圖中藏
閩山閩水看已徧卻對橫素春茫茫種花滿縣豈不好
息壤在彼無時忘上官苦留住莫府要使處處栽甘棠
先生掉頭不肯顧快過駿馬收危韁錦江波來動天地
秋風詎少鱸魚嘗歸來大笑索花答花亦喜舞爭低昂
拓室重開蔣陶徑論詩俯壓曹劉牆卽今秋晚氣蕭瑟
霜楓絢爛紛丹黃賞菊新釀秫秫米登高閒佩茱萸囊
有時開口向天笑仰見落月窺屋梁疏枝冷蕊解人意
衝寒已似回春光兄酬弟勸避俗客不辭一舉累百觴

我來披圖三歎息舉筆欲落神彷徨先公大參有詩癖
細摘佳句盈巾箱畫手通神蕭尺木誰爲題者宋荔裳
此圖不知入誰手石梅零落存荒莊子六世祖大參公
曾屬蕭尺木畫杜
詩三十幅同年宋荔裳以詩紀之寒家中落
此冊久失去予擬作浣花詩思圖以寓感 作歌兼懷
七葉感檐頭鐸語替戾岡嚴詩佗日編杜集一例還索
花平章

四君詠同張椒卿鐸陶靜涵貴鑑兩明經作

大風芒碭起真王下馬時時拜大梁死後烝嘗留漢帝
生前圖畫走秦皇單車往事開脩武一擊先聲奪博浪
兵法多師魏公子素書不合數張良

信陵

從此中原少戰兵，千秋失計是長平。
兩言空仗先生劍，一笑翻成豎子名。
祇向遺書求趙括，更無奇策進虞卿。
廉頗老去相如死，愁聽秦王擊缶聲。

平原

三窟營成計最工，辭公端合仗馮公。
債因牛酒魚餐費，士賴雞鳴狗盜功。
坐對偶人談土木，手操兩帝定雌雄。
誰知道上傳呼寵，齒冷邯鄲一縣中。

孟嘗

同時一樣居奇計，八覽終輸大賈尊。
吳地山川開霸氣，楚宮雲雨啄王孫。
纔看刀劍羞珠履，轉瞬頭顱挂棘門。
寂寞蘭陵荀祭酒，著書只辦萬餘言。

春申

四君之中信陵爲上，平原次之，孟嘗特一反覆小人。

春申則學文信侯而才又不逮者耳鄙見如此故四
詩先後不依列傳之次乙亥正月讀黃陶菴集其持
論正同可謂先得我心者矣因附記之

山館

窮陰寒谷逼孤館敝裘親白日不到地青山還背人狐
鳴呼社鬼樵語祝谿神默坐時長嘯端憂豈爲身

夜飲

癡雲頭上壓長劍撥難開風力欺詩筆寒威敵酒盃眼
中空四海天上問三台起舞夜將半荒郊鴻正哀

郭外

郭外煙初合，山中日已昏。
見人疑雜鬼，閉糴不成邨。
俗薄詩書賤，年荒盜賊尊。
犬聲如豹吠，里正又敲門。

寒甚有凍死者惻然憫之

縱使陽回大地春，鳩形幾日幸存身。
那堪風雪催殘命，可有枌村乞比鄰。
忍死儻能分振粟，偏荒無處作流民。
四郊何限溝中瘠，還望賢良善拊循。

買刀謠

有田不可穫，有賊不可斫。
賣得黃犢肉，作羹買得寶刀。
霜作鏑，賣犢賣田不賣身。
磨刀殺賊不殺人。

陽鱈

陽鱗紛紛上揭竿清商哀角變新彈漫勞門設蒼黃棒
豈有人探赤白丸歉歲或憂虧正賦窮民到底識尊官
偏災自古尋常事不信今時臥治難

轉漕

轉漕東南

帝曰咨撫綏流冗在監司饑荒幸免輸租調振貸何勞
費度支

聖主屢頒

寬大詔重臣終守

太平規富公成法蘇公策只在忠良佐

盛時

至日侍家慈飲

北陸迎長日南陔慶錫齡
雪窺雙鬢白山映一衿
青就婦謀春酒呼兒誦孝經
梅花消息到采采發芳馨

總宜山房曉起看雪

曉色光明射窗紙
童子大踟先生起
空中誰灑水晶鹽
一夜雪深三尺矣
披衣看雪山房開
凍雲壓山山爲隕
千峰萬峰一齊失
但見突兀撐瑤臺
山房便是清虛府
玉節蹠蹠樹幢羽
竹頭搶地強項僵
松頂掀天怒鱗舞
山房之後臨平原
藍田煙暖生瑤琨
角鷹側翅掠狐窟

饑鼠拱足噉鵝墳雪花片片大于掌玉龍夭矯三千丈
耳後風生少羽翰胸中雪亮思疇曩前年浪迹淮陰城
雪堆高與城頭平樓臺直接白蜃窟玻璃倒捲黃河聲
今春遇雪玉山山下白戰文壇誰健者春蠶颯沓揮秋兔
銀甲晶瑩盤玉馬今我鬱鬱意渺歡排空欲上黃雲端
鞭笞巽二叱滕六揮手亂撒冰珠寒卻笑書生健署腳
壯志空思窮六幕橫江風雪敢干人不如高唱江南樂
主人坐擁狐白裘銀餠煮酒聲幽幽平頭奴子進羊胛
只少侍女搗箜篌須臾窗外梨花凍山後山前翔白鳳
急取牀頭鐵篋吹一聲驚破羅浮夢

臘日記竈

檢點瓶盆事事親，妻拏盥漱起凌晨。
五辛轆釜驅窮鬼，六癸僉名祀竈神。
微祿但能邀主簿，濁醪何惜請比鄰。
今宵儻作靈公夢，定向君前細細陳。

幼艾歌成熟瓣香，竈涇司命坐中央。
頰顏只辦雙弓米，赤手思營十一方。
聊買豬肝求婦孝，何來蠟炬任人湯。
良田千頃吾無分，不爲黃羊換瘦羊。

偶書

一陣涼颼腦後過，微翻蠟淚點銅荷。
莫嫌風力尖能入，只是明窗空隙多。

酒力沖融到四支三蕉聊復一中之聖賢真樂吾能說
萬事無如恰好時

不寐

滿耳淒涼喚奈何披衣中夜起高歌狐狸導鬼谿頭語
鷓鴣鉤魂屋角過米價久愁凶歲貴哭聲新傍亂山多
連村尚少流亡戶荒政應無猛虎苛

謠傳

薄暮飛塵黯黯生謠傳刁斗警嚴城黑丸竟欲分曹部
黃冊應難按姓名未免催科傷太亟可知調卹尚持平
如何百里瀕江地日聽哀鴻亂蹕聲

草澤倉皇唱董逃，縣庭桀黠竟橫刀。
窖中幾欲囚梁道，厠上真疑捕巨高。
斷獄定須埋虎穴，餘殃祇恐爛牛毛。
聖朝三尺森然在，未爲饑寒恕爾曹。

山城

山城鼓角暮雲隕，低入荒郊慘不開。
賊掾竟難拘絮舜，富人競欲劫蘇回。
匭筒纔見投書進，建鼓俄驚剝面來。
第一民風須整頓，深憂端不在偏災。

送竈詞

尊空聊復酌清泉，那得黃羊作薦筵。
一飯未完聽轆釜，四郊強半斷炊煙。
稍欣積雪能滋麥，但願來秋或有年。

且莫塗餽醉司命醉中恐忘告皇天

元旦試筆

乙亥

空濛城郭鎖春煙和雨和風送綵牋人語但祈逢樂歲
天心似未厭凶年戲抽佛筭當雞卜豫遣奴星縛草船
愁絕客來無坐處昨宵償責典青氈

登山

穩跋芒鞋蹋溼煙滿身空翠聳吟肩登山未到三分地
已有游人望若仙

日者

蠟屐衝泥一雨初絕無行迹扣精廬熱腸未試雷公灸

冷眼偷窺日者書文字有靈憑福慧命官無印合樵漁
先生捧腹壺盧笑莫學湘纍賦卜居

偶書

曼卿老去歐公沒從此無人讀柳文相國寺前書滿肆
經年誰問穆參軍

二月廿八日姚子雋茂材錫範招同單師白譚石
舫天成周遠薊敦濂集城西烏目山房分韻得一

字

天宇蕩纖氛清游及良日山光澹容與湖氣斂深謚高
樓俛曾城盍截得疇匹數符珠緯五才謝竹林七姚子

發清唱勢若風雨疾周郎鬪奇麗三秀幽巖茁單伯暨

譚公懷寶等千鑑

二君詩
未成

微言請具陳撰異點鼓瑟吾

鄉山水靈閒氣時傑出九巫乘元雲升降定典秩尚父

坐茅漁釣國隱蓬華武城試牛刀絃歌徧比櫛鬱鬱昭

明臺文峰聳崔嵬自茲逮唐宋文獻頗遺佚琴川志雖

存軼事采猶失有明三百年更僕數可悉張吳始高蹈

濂洛闡精密處則爲醇儒出則作良弼流風被鄒邵古

訓是祇適名節謹大防赴義甘斧鑕腊肉兕可銘拜疏

鬼可叱餘事及文章專家有著述桑楊跡弛才文瀾恣

洄汨絳雲富琳瑯汲古積緹帙歎息東臯堂遺址莫可

詰虞山天柱傾誰爲拄礎礪邇來百餘載末學競佔畢
卮言徒詹詹穫實少挫挫矧此都人士衣冠改尹媯汎
祭誦茅鷗太康刪蟋蟀伊子秉微尚年少氣狂逸四瀆
雖涉三五嶽未登一丈夫志四方安肯事一室俄泣枯
魚銜旋駭獠犬獠粲粲承華跌棲棲樂衡泌北去息鯤
鵬南行夢丹黍飲易撓三爻癖左識六佾讀書辨同瑄
說詩正沮漆墨守城且書未學廷平律許身固已愚致
治詎無術下士聞某言粲然笑其啞狗曲詆王生烏窮
嗤趙壹諸君大雅材各抱瑚璉質或具靈運慧或得延
年筆芻蕘敢獻箴去華存其實陽烏日以邁疾比晨風

歛庶幾敦石交風誼協僑胼努力追前型古井得修緝
夜深籤轉丙語鱉魚鯁乙德星射牖明情與山水溢

蔣奇男上舍庸招同叔才集燕園賞牡丹余有事
不及與卻寄一律并示叔才

蠲尊折簡遞了童報道新開一品紅百樣名花都北面
十分春色待東風不因上冢隨山子敢效攢眉傲遠公
座中有僧可惜羊求不同賞月華三徑占西東

同叔才奇男習射邊前韻

充籠并夾付奚童媿乏弓衣織錦紅拂袂承簫懷抱月
鳴骸穿柳耳生風它時投地誇朱穆此日持籌效魏公

知山齋言身卷第十一
若使延年來署吏翁歸材調任西東

有謝余輩不能挽强者書以示之

挽弓豈必六鈞彊男子由來志四方欲向南山銳猛虎
更浮東海挂樽桑論書力或愁官笥揚解觀難學堵牆
試舉翻旌聽唱獲采蘩容節叶宮商

戒酒

姬公戒困酒坎坎繫勞卦武公戒飲酒抑抑慎出話豈
徒五禮坊兼淨六根界譬如糟中布水濡日以壞譬如
陶家土火化日以敗想當入口時一酬詎不快而其潛
相攻螫毒劇蠶蠹重爲長卿渴輕作齊侯疥與其鑿延

緩曷若解揚賁伊余慳酒德達人譏其介近者中聖賢
稍稍破天械其如鼯鼠腹此中地本隘一唾齧然空七
日甚矣憊念昔趨庭時節飲有深誠指口但三啣舉手
每百拜音容旣已邈日月忽逾邁立身訓頓忘荒宴等
聾聵更念北堂母當食發三喟誓將跪母前刺血寫遺
畫枕孝經一編受孔子五戒口不贊酒功身免負酒責
酒箴反飲酒羸瓶箬夫夫

麥秋大稔畝得二鍾然一春無雨土堅如鐵新秧
未蒔米價日增仍難免飢寒之感五月十日快雨
徹夜喜極不寐枕上口號

芒種初交日進壬雷霆滿腹蟄龍瘖天田春晚曾攜角
太歲秋來合守心萬頃黃雲收麥氣一番紅霧作梅霖
明朝秧馬塍頭徧始信天公用意深

食杏

仙人董奉遺書至乞我仙林藥一丸懷核願栽千萬本
家家齊喫大還丹

詠史

漢武稱得人拔迹在羊豕孫宏拜丞相卜式爲御史兒
寬在北地亦視畜數年孟堅有深識作傳乃合編鄙夫
作公卿言利必織屨桑孔市井徒遂至權鹽鐵

字物如字人擾民如擾畜苟能通其理亦足爲良牧張
湯本乾沒毛摯同秋鷹揚可告緡縱郡國爲沸騰封禪
兼開邊祠遂起巫蠱迺知田野夫終勝大腹賈

讀張湯傳

江充前已興巫蠱從此聲名達九重劾鼠已摧中執法
烹羊兼筦大司農園錢并欲傾青翟皮幣惟聞鑄白龍
到底輸佗儒吏福兒寬猶得與東封

報復由來命在天心驚八輩到門前舞文濫斷江都獄
密奏潛撓宰相權仄目豈惟三長史傷心猶恨五銖錢
惡名雖被能湔洗地下應慚若母賢

送朱子佑奎保歸金陵

琴河新漲七條絃十里荷花送客船
魏我春風虛一室與君秋駕遲
三年山圍北固江無際路入南徐
月定圓它日扁舟相問訊垂楊遙指白門邊

詠史

漢高提劍起大難遂削平諒由良平力外則資韓彭
乃聞淮陰侯言帝善將將側想萬人敵本出項籍上神武
固天授繫豈無淵源淵源自信陵兵法數萬言當其爲
布衣雅游客張耳耳昔少年時曾客魏公子所以穀城
石僅留侯葆祠大梁一荒冢迺歲歲祀之

漢初學未立勃興得賈生其言綜儒墨學本出荀卿生
年未冠時吳公寘門下源流經指授氣質就陶冶吳公
治第一少曾事李斯斯學於蘭陵後貴乃背師所以生
著書蔚爲王者佐諸老先生言竭思不能過斯也志溫
飽懂羨鼠盜倉一旦禍機發牽狗悲倉皇苟能淡寵榮
自可逃秦法或者佐張蒼成漢萬世業

倉海君河人義出田橫右力士博浪椎勝慶卿七首惜
哉史闕略姓字俱莫知徒令千載後遙遙想望之當良
在下邳進履圯上老宗闕略不展毋乃太草草亮惟此
數子慮漢高罵人沈幾豫韜晦抗節不肯臣晨會必先

人蹤跡頗詭異卽此是兵機豈在立文字子房善緣飾
黃石與素書如從赤松游詎有此事歟彼商山四公沖
舉奮羽翼聲名動帝王終可羅而得

舳艫蔽江下赤壁燒曹軍夷陵八百里連營竟被焚周
郎暨陸公天遣助王業亦緣三吳人本善火攻法孫子
十三篇篇名標火攻占星候箕翼用火兼用風時日固
有宜地利亦乘便艤艫與翳薈一炬若流電阿瞞旣多
詐又注孫子書巧者有時拙一黃蓋不如